



جابتن حال إحوال اكلام إسلام قولاه فینخ
JABATAN HAL EHWAL AGAMA ISLAM PULAU PINANG



TEKS KHUTBAH
**MINDA INOVATIF,
JIWA MADANI:
DI SEBALIK SEBUAH IDEA**



Tarikh Bacaan:
24 OKTOBER 2025M / 2 JAMADIL AWAL 1447H

Dibiayai :



MAJLIS AGAMA ISLAM
NEGERI PULAU PINANG

Diterbitkan :



JABATAN HAL EHWAL AGAMA ISLAM
PULAU PINANG

Jawatankuasa
Panel Semakan Teks Khutbah
Negeri Pulau Pinang

- 1. Sahibus Samahah Prof. Madya Dato' Dr. Mohd Sukki bin Othman (Pengerusi)**
Mufti Kerajaan Negeri Pulau Pinang
- 2. YBhg. Ustaz Muhammad Fadzil bin Alias**
Pengarah, Yayasan Dakwah Islamiyah (YADIM) Pulau Pinang
- 3. YBhg. Ustaz Ahmad bin Hashim**
Penasihat, Pusat Pengajian Tahfiz Al-Quran (PPTQ)
Kolej Islam Teknologi Antarabangsa Pulau Pinang (KITAB)
- 4. YBhg. Ustaz Subki bin Mohamed**
Mantan Pensyarah Kanan, IPG Kampus Tuanku Bainun
- 5. YBrs. Dr. Mohamad Zaki bin Hj Abdul Halim**
Penolong Mufti, Bahagian Fatwa,
Jabatan Mufti Negeri Negeri Pulau Pinang
- 6. YBhg. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 7. YBhg. Ustaz Ahmad Shahimi bin Senawi**
Pendakwah
- 8. Ustaz Mohd Hanif bin Omar @ Wahab (Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)



Minda Inovatif, Jiwa Madani: Di Sebalik Sebuah Idea

(Khutbah Khas sempena Minggu *Festival Of Ideas* Zon Utara)

الْحَمْدُ لِلَّهِ الْقَائِلِ: وَلَقَدْ وَصَّيْنَا الَّذِينَ أُوتُوا الْكِتَابَ مِنْ قَبْلِكُمْ وَإِيَّاكُمْ أَنْ اتَّقُوا اللَّهَ

سوره النساء: 131

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.
اللَّهُمَّ صَلِّ وَسَلِّمْ عَلَى نَبِيِّنَا مُحَمَّدٍ وَعَلَى آلِهِ وَصَحْبِهِ وَمَنْ دَعَا بِدَعْوَتِهِ إِلَى يَوْمِ
الدِّينِ.

أَمَّا بَعْدُ، فَيَا عِبَادَ اللَّهِ اتَّقُوا اللَّهَ أَوْصِيَكُمْ اللَّهُ وَنَفْسِي بِتَقْوَى اللَّهِ وَطَاعَتِهِ لَعَلَّكُمْ
تُفْلِحُونَ.

SIDANG JUMAAT YANG DIRAHMATI ALLAH,

Marilah bersama-sama kita meningkatkan ketakwaan kepada Allah
سُبْحَانَهُ وَتَعَالَى dengan bersungguh-sungguh melaksanakan segala perintah-
Nya dan meninggalkan segala larangan-Nya. Mudah-mudahan kita
mendapat rahmat dan keberkatan hidup di dunia dan di akhirat.

Khatib juga mengingatkan para jemaah agar memberikan sepenuh
perhatian kepada khutbah yang akan disampaikan. Elakkan diri dari
melakukan perkara yang memesongkan fokus daripada isi kandungan

khutbah. Bersempena dengan Program *Festival Of Ideas* yang diadakan di Pulau Pinang, khatib akan membicarakan khutbah yang bertajuk : ***Minda Inovatif, Jiwa Madani: Di Sebalik Sebuah Idea***

SIDANG JUMAAT YANG DIRAHMATI ALLAH,

Dalam zaman yang serba moden dan pantas ini, kita menyaksikan betapa dunia sedang berubah dengan kepesatan inovasi, limpahan idea dan gelombang teknologi yang tidak pernah surut. Dalam lautan maklumat ini, umat Islam tidak boleh bersikap pasif dan hanya menjadi pengguna. Kita dituntut untuk menjadi pencetus idea, pembina tamadun dan pemacu perubahan yang berteraskan nilai-nilai MADANI.

Inovasi bukan sekadar satu ciptaan teknologi, tetapi ia adalah hasil dari fikiran yang tajam, pandangan yang luas dan hati yang luhur. Setiap ciptaan besar bermula dari sebuah idea kecil, yang dibajai dengan kesungguhan, doa dan tawakal kepada Allah. Dalam Islam, penciptaan dan pembaharuan adalah satu ibadah jika diniatkan untuk kemaslahatan ummah.

Lihatlah bagaimana Allah **سُبْحَانَهُ وَتَعَالَى** mengajar kita untuk membaca, meneliti dan berfikir melalui firman-Nya:

بِسْمِ اللَّهِ الرَّحْمَنِ الرَّحِيمِ

أَقْرَأْ بِأَسْمِ رَبِّكَ الَّذِي خَلَقَ ① خَلَقَ الْإِنْسَانَ مِنْ عَلَقٍ ② أَقْرَأْ وَرَبُّكَ الْأَكْرَمُ ③ الَّذِي عَلَّمَ بِالْقَلَمِ ④ عَلَّمَ الْإِنْسَانَ مَا لَمْ يَعْلَمْ ⑤

Maksudnya: *“Bacalah (wahai Muhammad) dengan nama Tuhanmu yang menciptakan (sekalian makhluk). Ia menciptakan manusia dari sebuku darah beku. Bacalah, dan Tuhanmu Yang Maha Pemurah, Yang mengajar manusia dengan pena dan tulisan. Ia mengajarkan manusia apa yang tidak diketahuinya.”* (Surah al-'Alaq ayat 1-5)

Ayat ini bukan sekadar seruan untuk membaca, tetapi satu dorongan untuk membina budaya ilmu, menyuburkan idea dan mencetus inovasi. Inilah titik tolak sebuah kebangkitan.

SIDANG JUMAAT YANG DIKASIHI,

Idea yang baik mampu mengubah nasib individu, masyarakat, bahkan negara. Negara kita Malaysia sedang mengorak langkah dengan agenda Malaysia MADANI, yang mengangkat nilai kemampanan, kesejahteraan, daya cipta, hormat, keyakinan dan ihsan.

Di bawah semangat MADANI, inovasi perlu lahir dari akar nilai, bukan semata-mata hasil persaingan ekonomi. Umpamanya di Pulau Pinang, negeri yang menjadi hab industri dan pelancongan, kita juga menyaksikan banyak inisiatif komuniti dan masjid yang memanfaatkan idea-idea kreatif untuk pembangunan sosial. Masjid bukan hanya tempat ibadah, tetapi pusat pembelajaran, pusat pemerikasaan belia dan pusat inovasi sosial.

Rasulullah ﷺ sendiri adalah insan paling inovatif. Baginda mengubah masyarakat jahiliah menjadi masyarakat bertamadun dalam tempoh 23 tahun. Idea besar baginda tentang keadilan, kesamarataan,

pendidikan dan kebersamaan membentuk tapak kepada tamadun Islam yang agung. Baginda ﷺ bersabda:

إِنَّ اللَّهَ يُحِبُّ إِذَا عَمِلَ أَحَدُكُمْ عَمَلًا أَنْ يُتْقِنَهُ

Maksudnya: "Sesungguhnya Allah suka apabila seseorang daripada kamu melakukan sesuatu pekerjaan, dia melakukannya dengan tekun."

Tekun itu adalah satu sifat yang penting dalam mendokong inovatif. Dalam proses inovasi, idea baharu jarang terus berjaya dalam sekali percubaan. Biasanya perlu banyak percubaan, pembetulan dan penambahbaikan. Di sinilah sifat ketekunan menjadi salah satu perkara penting agar seorang yang ingin melakukan satu inovasi tidak cepat berputus asa. Itulah rahsia kejayaan.

SIDANG JUMAAT YANG DIRAHMATI ALLAH,

Kita hari ini tidak lagi kekurangan sumber. Kita mempunyai modal insan, akses teknologi, dan ruang untuk mencipta. Yang kita perlukan adalah budaya menghargai idea. Ramai yang takut memberi pandangan, bimbang ditolak. Ada yang takut gagal, lalu tidak mencuba. Sedangkan Allah menilai usaha, bukan hanya hasil. Allah menilai niat, bukan semata kejayaan duniawi.

Inovasi dalam Islam bukanlah semata-mata alat moden, tetapi nilai dan cara berfikir. Saidina Umar al-Khattab رضى الله عنه pernah menggugurkan pemberian zakat kepada muallaf tatkala Islam sudah kuat. Itulah ijtihad -

bentuk inovasi dalam pentadbiran. Imam al-Syafie merombak sebahagian fatwa ketika beliau berpindah dari Iraq ke Mesir, menyesuaikan dengan realiti setempat - itulah fleksibiliti dalam berfikir.

Begitu juga dengan institusi masjid dan pendidikan hari ini. Jika dahulu masjid hanya untuk solat, kini ia boleh menjadi pusat terapi sosial, bimbingan kerjaya, dan pendidikan keluarga. Jika dahulu kuliah hanya dalam bentuk syarahan, kini ia boleh disampaikan melalui podcast, TikTok, dan infografik - asalkan isinya benar dan matlamatnya murni.

Di Pulau Pinang, banyak ruang untuk idea besar dikembangkan dengan kerjasama antara masjid, universiti dan masyarakat. Kita boleh membina gerakan dakwah kontemporari yang menyentuh semua peringkat umur. Dari kelas inovasi untuk belia, bengkel keusahawanan sosial, hingga pameran sains Islam - semua ini adalah medan dakwah yang baharu.

SIDANG JUMAAT YANG DIRAHMATI ALLAH,

Mengakhiri khutbah pada minggu ini, maka marilah kita menanam tekad:

Pertama: Menyuburkan budaya inovasi dalam kalangan masyarakat dan ahli keluarga.

Kedua: Menghargai idea sesiapa sahaja walau idea yang kecil sekalipun daripada individu biasa.

Ketiga: Menyokong inovasi yang berdasarkan panduan yang betul.

Keempat: Memimpin perubahan berasaskan nilai MADANI selari dengan gagasan kerajaan hari ini.

Allah سُبْحَانَهُ وَتَعَالَى berfirman dalam Surah al-Baqarah ayat 269:

يُؤْتِي الْحِكْمَةَ مَنْ يَشَاءُ وَمَنْ يُؤْتَ الْحِكْمَةَ فَقَدْ أُوتِيَ خَيْرًا كَثِيرًا وَمَا يَذَّكَّرُ إِلَّا أُولُو

الْأَلْبَابِ ﴿٢٦٩﴾

Maksudnya: “Allah memberikan hikmah kebijaksanaan (ilmu yang berguna) kepada sesiapa yang dikehendaki-Nya (menurut aturan yang ditentukan-Nya). Dan sesiapa yang diberikan hikmat itu maka Sesungguhnya ia telah diberikan kebaikan yang banyak. Dan tiadalah yang dapat mengambil pengajaran (dan peringatan) melainkan orang-orang yang menggunakan akal fikirannya”.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ، وَتَقَبَّلَ اللَّهُ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ، الْأَحْيَاءِ مِنْهُمْ وَالْأَمْوَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.



Khutbah Kedua

2025M/1447H

الْحَمْدُ لِلَّهِ رَبِّ الْعَالَمِينَ، وَالصَّلَاةُ وَالسَّلَامُ عَلَى سَيِّدِنَا مُحَمَّدٍ النَّبِيِّ الْأَمِينِ، وَعَلَى
آلِهِ وَأَصْحَابِهِ وَالتَّابِعِينَ، وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، لَهُ الْمُلْكُ وَلَهُ الْحَمْدُ يُحْيِي وَيُمِيتُ وَهُوَ
عَلَى كُلِّ شَيْءٍ قَدِيرٌ، وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى سِرَاجٍ مُنِيرٍ.

صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِينَةَ عَرْشِهِ وَمِدَادَ كَلِمَاتِهِ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ وَمَرْضَاتِهِ.

MUSLIMIN YANG DIRAHMATI ALLAH,

Fatwa Negeri Pulau Pinang memutuskan bahawa penjualan hartanah milik orang Islam kepada orang bukan Islam adalah haram sekiranya digunakan bagi tujuan yang bercanggah dengan Syarak seperti rumah ibadat agama lain, kilang makanan haram, ladang khinzir, pusat hiburan dan perjudian. Secara umum, hukum menjual tanah orang Islam kepada bukan Islam adalah tidak harus, kecuali dalam keadaan darurat yang benar-benar menepati Maqasid Syariah serta dengan syarat:

1. Tanah tersebut bukan dalam kawasan majoriti penduduk Islam, bukan tanah rezab atau khusus untuk Bumiputera Islam

2. Tidak berpotensi dimanfaatkan untuk urusan agama Islam, telah ditawarkan terlebih dahulu kepada orang Islam dalam tempoh munasabah dan hanya dijual sekadar memenuhi keperluan mendesak tanpa berlebihan.

Fatwa juga menegaskan bahawa semua institusi Islam di Pulau Pinang wajib menjaga serta memperkukuh pemilikan hartanah orang Islam agar sekurang-kurangnya seimbang dengan jumlah populasi Bumiputera Islam di negeri Pulau Pinang yang tercinta ini.

قَالَ اللَّهُ تَعَالَى: إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا.

اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ.
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،
اللَّهُمَّ أَعِزِّ الْإِسْلَامَ وَالْمُسْلِمِينَ، وَدَمِّرْ أَعْدَاءَكَ أَعْدَاءَ الدِّينِ وَانصُرْ مَنْ نَصَرَ الدِّينَ،
وَاخْذُلْ مَنْ خَذَلَ الْمُسْلِمِينَ، وَأَعْلِ كَلِمَتَكَ إِلَى يَوْمِ الدِّينِ.

اللَّهُمَّ انصُرْ إِخْوَانَنَا الْمُسْلِمِينَ وَالْمُجَاهِدِينَ وَالْمُسْتَضْعَفِينَ فِي فَلَسْطِينَ وَفِي كُلِّ مَكَانٍ، وَفِي كُلِّ زَمَانٍ، بِرَحْمَتِكَ يَا أَرْحَمَ الرَّاحِمِينَ.

اللَّهُمَّ أَصْلِحْ أئِمَّتَنَا وَوُلَاةَ أُمُورِنَا، وَاجْعَلْ وَلَائِنَا فِيْمَنْ خَافَكَ وَاتَّقَاكَ يَا رَبَّ الْعَالَمِينَ. اللَّهُمَّ اجْعَلْ بَلَدَنَا مَالِيزِيَا خُصُوصًا وَلَايَةً قَوْلَاوٍ فَيَنْعَ آمِنًا مُطْمَئِنًّا سَخَاءَ رَحَاءَ، دَارَ عَدْلٍ وَإِيمَانٍ، وَأَمْنٍ وَأَمَانٍ، يَا ذَا الْفَضْلِ وَالْإِحْسَانِ.

اللَّهُمَّ وَفِّقْ قَادَتَنَا وَرُعَمَاءَنَا وَوُلَاةَ أُمُورِنَا لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Sultan Ibrahim dan Kebawah Duli Yang Maha Mulia Seri Paduka Baginda Raja Permaisuri Agong, Raja Zarith Sofiah.

وَكَذَلِكَ صَاحِبِ الْفَخَامَةِ،

Tuan Yang Terutama Tun Dato' Seri Utama Haji Ramli bin Ngah Talib, Yang di-Pertua Negeri Pulau Pinang dan Yang Mulia Toh Puan Raja Dato' Seri Utama Noora Ashikin binti Raja Abdullah.

Ya Allah, ampunilah dosa kami, dosa ibu bapa kami, kaum keluarga kami, serta seluruh umat Islam sama ada yang masih hidup ataupun yang telah kembali kepada-Mu.

Ya Allah, jauhkanlah kami daripada riba, rasuah, penyelewengan dan pengkhianatan serta bersihkan masyarakat kami daripada segala bentuk penindasan dan kezaliman.

Ya Allah, berilah kekuatan kepada kami untuk menunaikan zakat serta melaksanakan wakaf melalui Majlis Agama Islam Negeri Pulau Pinang agar ia menjadi sumber kebaikan dan kemajuan umat Islam di negeri yang tercinta ini.

Ya Allah, satukanlah hati-hati kami, tanamkanlah rasa percaya kepada pemimpin kami dan jauhkanlah kami daripada fitnah serta perpecahan. Rahmatilah para pemimpin negeri dan pihak berkuasa agama agar sentiasa Engkau bimbing di atas jalan yang benar.

Ya Allah, lindungilah kami daripada bala bencana dan jadikanlah kami hamba-hamba-Mu yang Engkau kasihi.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ عَلَىٰ نِعَمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ.



جابتن حال إحوال اكلام إسلام قولاه فینخ
JABATAN HAL EHWAL AGAMA ISLAM PULAU PINANG